



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### **Commentaria Vetustissima & profundissima Super Canticvm Canticorum Salomonis Qvod Hebraice Dicitvr Sirhasirim**

**Wolbero <de Sancto Pantaleone>**

**Coloniae Agrippinae, 1630**

Versvs VIII. Dixi, ascendam in palmam, & apprehendam fructum eius: & erunt vbera tua sicut botri vineae: & odor oris tui sicut odor malorum.

**urn:nbn:de:hbz:466:1-10027**

## VERSUS VIII.

*Dixi, ascendam in palmam, & apprehendam fructum eius: & erunt vbera tua sicut botri vineæ: & odor oris tui sicut odor malorum.*

Dicere Dei est aut tempora sæcularia determinare.

**A**C si eidem Sponsæ suæ patienter dicat, unde habes vincere, unde habes proficere? estne tuæ virtutis & industriæ, quod tantæ pulchritudinis decus tibi potes comparare? Si rectè consideres, nequaquã tuæ fortitudini vel prudentiæ alicuius boni meritum ascribes. Ego enim dixi, hoc est ante tempora sæcularia decreui & determinatè disposui, & quia per ligni prævaricationem occubuisti, & impotens esse cepistis, & inimicum sibi ipsi peccando inuenisti, cui postmodum prævalere non potuisti, sed quasi captiua eius dominio subiacuisti, rursus per ligni oppositionem perditum tibi bonum recuperare, & ab inimici potentiâ, & à captiuitate quâ detinebaris eriperem, redditaque libertate inimicū sibi substernerem, & contra eius insidias prouidentiam sibi præcauendo & virtutem resistendi darem.

Ascensus palmæ fuit ascensus Christi in crucem eius fructum resurgendo apprehendit.

Idcirco dixi, ascendam in palmam, hoc est in crucem, in quam postquã de hoste triumphauero, & fructus huius passionis meæ apprehendero, atque in signum victoriæ resur-

gendo protulero, omnibus mihi obedientibus, & in meâ virtute spem habentibus huius consolationis oraculum proferam, *confidite ego vici mundum.* Tu ergo debes pugnare, & quia secura es de victoriâ me victoriam iam adeptus, crucem mecum carnem mortificando ascende ut omnis *statura* tuæ animæ assimiletur *palmæ*, & perseuerantiæ titulo æternæ mancipetur victoriæ.

Ioh. 16.

Sed veneranda & adoranda omni animæ huius *ascensio palmæ*. Quare? quia magnus profecto & incomparabilis fructus eius: quid enim? nonne per hunc fructum resectum & reparatum est totum genus humanū? quis autem & qualis fructus iste fuit & est? nimirum generis humani redemptio, inimicitia erga Deum reconciliatio, quotidiana peccatorum remissio, contra insidias inimici firma defensio, mundanæ miseræ exitus, & regni cælestis introitus.

Ascensio palmæ siue crucis ob quid venerando & adorando omni animæ.

Omnis enim profectus Ecclesiæ ex tēpore passionis & resurrectionis Christi capit, atque exinde sanctitatis eius præconia & spiritus sancti dona abundantissimè profluxerunt. Unde & sequitur, *& erunt vbera tua sicut botri vineæ & vox oris tui sicut odor malorum.*

Profectus Ecclesiæ post passionem & resurrectionem Christi coepit.

Nam prædicatio & doctrina eius post remotionem umbræ per exhibitionem veritatis suauior & vberior emanauit, & post passionem & resurrectionem Christi, multos



multos diuinâ charitate ita ebrios fecit, vt omnem in eis mūdānā voluptatis humorē calore sancti spiritus excoxerit, & ad cælestis vitæ amorem accenderit.

Per guttur memoria præceptorū, per vocē prædicatio illorum accipitur.

Ex gutture verò vox egreditur, & idcirco *per guttur* memoria præceptorum diuinorum, *per vocem* ipsorum præceptorum prædicatio non incongruè accipitur: nisi enim primò in mente per memoriam teneantur, minimè foras per sermonem proferentur. Sed huiusmodi *vox sermonis malorum odori* comparatur, quia sicut per odorem res non tantum præsens, sed etiam absens sentitur, sic à tempore passionis & resurrectionis Christi per prædicationem Ecclesiæ, non tantum præsentia Domini ipsius, siue sanctorū eius facta & dicta, sed etiam præterita cognita sunt, & quotidie legendo & audiendo cognoscuntur: futura quoque bona seu mala ex his colliguntur, quando & iustorum præmia & peccatorum supplicia lōgè quasi ex quodam intimi tactus odore pensantur. Non autem ad *odorem florum*, sed *malorum vox* ista refertur, quia prædicatio Ecclesiæ quæ nunc per totum resonat mundum, non rudis vel tenera, sed matura & perfecta vnā fidem credentibus ostendit.

Prædicatio diuinorum præceptorum odori malorum comparatur.

VERSUS IX.

*Guttur tuum sicut vinum optimum, dignum dilecto meo ad potandum, labijs-*

*que & dentibus illius ad ruminandum.*

**G**uttur verò sicut vinum optimum dicitur, quia memoria præceptorum diuinorum mentem sui dulcedine inebriat, & quod suauiter interius meditando bibit, vtiliter exterius eloquendo profundit: *dignum dilecto meo ad potandum*, Christus in corpore suo, hoc est in Ecclesiâ, quæ cum eo per Spiritum vnum efficitur, sicut iustitiâ, fide, & sanctitate refici, ita & potari dicitur; quemadmodum è contrario in infidelibus iustitiâ fidem & sanctitatem esurire atque sitire prædicatur. Nam in cruce pendens cum diceret *sitio*, fidem & sanctitatem infidelis populi sitiebat, quia propter eum quasi quodam æstu laboris fatigatus fuerat, quem de Ægypto multis signis & portentis eduxerat, ante quorum faciem gentes contriuerat ad quos testamenti sui & legis pactum confirmauerat, quibus terram repromissionis, urbem templumque delegauerat, pro quorum salute postremò ipsam mortem suscipere non dedignatus fuerat.

Memoria diuinorum præceptorum dicitur vinum optimum, & quare.

Ioh. 19.

Cum ergò sancta Ecclesia, siue sancta qualibet anima legem Domini die ac nocte meditatur, in mente ipsius Christus quodam dulci meditationis vino potatur, & illius sancta meditatio, & quasi suavis & digna Deo potatio. Vnde cum sponsus *guttur dilecte*, hoc est meditationem mandatorum

Meditatio in lege Domini digna est Deo potatio